



CENTRALE BANK VAN ARUBA

BCA ta mantene e reserva obligatorio na 24,0 por ciento entrante 1 di october 2022.


Relato di prensa

Conforme e tarea di e Comité di Maneho Monetario (CMM) pa evalua, determina y duna transparencia riba e accionnan di maneho monetario di Banco Central di Aruba (BCA), BCA ta comunica lo siguiente. Durante e reunion di 14 di september 2022, CMM a dicidi pa mantene e reserva obligatorio na 24,0 por ciento entrante 1 di october 2022. Di e manera aki, e banconan comercial mester tene un balansa minimal na BCA cu ta igual na 24,0 por ciento di e depositonan riba termino cortico di nan clientenan. E decision pa mantene e reserva obligatorio na 24 por ciento ta basa primordialmente riba e bahada continuo den e nivel di likides excesivo na e banconan comercial, ademas di un nivel adecua di reservanan oficial y internacional.

E CMM a considera e siguiente informacion y analisis den su deliberacion:

Reservanan internacional y oficial

E reservanan internacional, cu ta consisti di reservanan oficial di BCA y reservanan di divisa na e banconan comercial a subi cu Afl. 355,0 miyon (Grafico 1) riba 26 di augustus 2022, compara cu fin di december 2021. E reservanan oficial a aumenta cu Afl. 269,0 miyon, mientras cu e reservanan teni pa banconan comercial a subi cu Afl. 86,0 miyon. Consecuentemente, riba 26 di augustus 2022, e reservanan internacional y oficial a suma Afl. 3.484,6 miyon y Afl. 3.013,9 miyon, respectivamente. Pa e resto di 2022, BCA ta premira mas expansion den e reservanan oficial y internacional debi na extra entrada di divisa relata na turismo y un subida den inversion procedente di exterior. Sostene un nivel adecua di reservanan ta critico pa mantene e tasa di cambio fiho entre e florin Arubano y e dollar Mericano. Teniendo cuenta cu esaki, BCA ta anticipa cu e reservanan internacional lo keda ampliamente riba e tres luna di pago riba e cuenta corriente di e balansa di pago. E pagonan riba e cuenta corriente di e balansa di pago ta consisti di pagonan pa importacion, pagonan di interes na inversionistanan stranhero y transferencianan pa exterior manera placa manda afo door di trahadonan stranhero. Ta proyecta cu e reservanan oficial lo keda dentro di e margen aceptabel basa riba e metrico 'Assesing Reserve Adequacy' (ARA) di e Fondo Monetario Internacional (FMI) (Tabel 1).



Tabel 1: Metriconan relata na reserbanan observa den 2022

	jan	feb	mar	apr	mei	jun	jul
Cobertura di pagonan riba cuenta corriente ¹	8,8	8,7	9,4	9,3	9,2	8,8	8,7
Metrico di FMI ARA ²	110,9	110,2	123,7	127,0	127,5	124,7	127,8

¹ E cantidad di luna di pagonan riba cuenta corriente cu e reserbanan internacional ta cubri.

² E proporcion entre e nivel di reserbanan oficial y e nivel mínimo adecua (conforme FMI), den porcentonan.


Inflacion

Na juli 2022, e Indice di Prijs di Consumo (IPC) a subi cu 6,0 por ciento compara cu e mesun luna di e aña anterior (Grafico 2). E aumento aki den e IPC compara cu e mesun luna di e aña anterior tabata causa door di e crecimiento den prijs di gasoline, cu a afecta e componente di ‘transporte’ (contribuyendo cu 3,4 punto di porcentahe). Subidanan den e componentenan ‘cuminda y bebida no alcoholico’ (contribuyendo cu 1,2 punto di porcentahe), ‘operacion di vivienda’ (contribuyendo cu 0,5 punto di porcentahe), ‘recreacion y cultura’ (contribuyendo cu 0,4 punto di porcentahe), ‘restaurant y hotel’ (contribuyendo cu 0,3 punto di porcentahe), y ‘otro bienes y servicio’ (contribuyendo cu 0,3 punto di porcentahe) tambe a contribui na aceleracion di inflacion compara cu e mesun luna di e aña anterior. Mientrastanto, e inflacion midi riba promedio di 12 luna a crece te na 3,7 por ciento. BCA ta proyecta cu e preshon inflacionario lo persisti durante e resto di 2022. E expectativa aki ta basa riba e nivel eleva di prijs di

petroleo riba mercadonan internacional y ahustenan den prijs di awa y coriente entrante augustus 2022 y september 2022. Ademas, Aruba ta importa un gran parti di e aumentonan den prijs for di su partnernan di exportacion, particularmente for di Estados Unidos y Europa.


Na juli 2022, inflacion basico (excluyendo cuminda y energia) a alcanza 2,5 por ciento si midi e final di respectivo luna contra e mes un luna di e aña anterior. Inflacion basico midi na final di e respectivo luna contra e mesun luna di e aña anterior a wordo primordialmente causa pa e componente di ‘transporte’ (contribuyendo cu 1,0 punto di porcentahe), resultando for di aumento den prijsnan di auto (contribuyendo cu 0,8 punto di porcentahe). E componentenan ‘operacion di vivienda’ (contribuyendo cu 0,5 punto di porcentahe), ‘recreacion y cultura’ (contribuyendo cu 0,4 punto di porcentahe), ‘restaurant y hotel’ (contribuyendo cu 0,3 punto di porcentahe), ‘otro bienes y servicio’ (0,3 punto di porcentahe), y ‘cuminda y bebida no alcoholico’ (contribuyendo cu 0,1 punto di porcentahe) tambe a contrubui na e inflacion basico midi contra e mes un luna di e aña anterior. Basa riba un promedio anual, inflacion basico a yega na 1,7 prociento.

Grafico 2. Inflacion basa riba e indice di prijs di consumo
(Fuente: CBS, juli 2022)



Likides excesivo na banconan comercial

E total di likides excesivo na e banconan comercial a baha di Afl. 1.1320,5 miyon na december 2021 te na Afl. 841,7 miyon na juli 2022 (Grafico 3). E caida aki den likides excesivo ta debi principalmente na e subidanan consecutivo den e tasa di reserva obligatorio durante e prome seis lunanan di 2022. No obstante, e nivel di likides excesivo a keda mas halto cu e nivelnan midi prome cu e pandemia (+Afl. 152,6 miyon). E nivel halto di likides excesivo tabata a causa di e nivel eleva di fondonan di likides (cu ta inclui cash, bononan di gobierno y otro activo likido) na banconan comercial, empuha tambe door di e nivel abou di demanda pa credito. Sinembargo, financiamento local di proyectonan relata na turismo y di negoshinan probablemente lo crece significantemente den e di dos mita di 2022, resultando den un bahada di e nivel di likides excesivo na e banconan comercial.



Banco Central di Aruba
1 november 2022